

Per che las partidas restian crediblas

Pled d'avertura per la sessiun d'atun

DA FLURIN ANDRY / ANR

■ **L'influenza da las lobis e las differentas gruppas d'interess sin la politica n'è en Svizra strusch reglementada e controllada. Alessandro Della Vedova ha discurre davart questas influenzas.** «Democrazia è l'art da lassar crair il pievel ch'el regnia», cun quest citat da Jean Francoise de la Harpe ha cumenzà *Alessandro Della Vedova* (pcd, Mesocco) ses emprim pled d'avertura per la sessiun d'october. Suenter avair gratulà a tut las personas elegidas dumengia passada per l'assemblea federala ha el prendì cun quest citat l'ocasiun da far in pèr patratgs davart quest tema.

«Lobis – ina part integrala da nossa democrazia»

Durant las emprimas emnas da ses presidi ha Della Vedova s'ha participà a numerusas occurrenz e s'inscuntrà e discurre cun blera glieud. «Nossas burgais e burgais s'interessan fitg per ils fatgs politics, jau hai però era badà ch'i regna ina tscherta frustraziun che las fatschentas na sa sviluppan betg adina sco ch'ins vules», ha'l ditg, e sa dumandà sch'il aforissem cità cuntegna forza in minz vardad. «Sche quai fiss uschia, tgi è alura la persuna che tira las cor-

das?» Ad Alessandro Della Vedova è vegnidas spontanamain endament las gruppas d'interess, las lobis. Sco ch'el ha ditg èn ellas ina part integrala da la democrazia svizra: «Savens sa tracta da minoritads che tschertgan atenziun e consentiment, tant cur ch'emprovan da'ns sensibilisar per ils problems d'intschert sector economic sco era cur ch'ellas represchantan las pretensiuns da las commembras e commembers d'in sindicat u d'ina da las numerusas organisaziuns che gidan a sviluppar nossa societad u a mantegnair in bain public.»

Cuntanscher decisiuns che vegnan purtadas da blers

Per evitar eventuels referendums vegni, tenor il president dal parlament grischun, guardà d'integrar tut las partidas participadas e da resguardar tut ils interess pertutgads. «La lavur da lobi po vegnir considerata sco med per resguardar tut ils interess e las infurmaziuns che pudessan esser utilas per cuntanscher ina decisiun che vegn purtada d'ina basa uschè vasta sco pussaivel», ha manegià Della Vedova ed accentuà ch'ins na duaja betg diabolisar las lobis: «Tuttina fissi naiv da betg resguardar co ch'ellas influenzeschan mintga singula deputada u deputà per survegnir sia

bainvulientscha.» El ha agiunt che la Svizra saja in da quels pajais, en ils quals l'influenza tras cuminanzas d'interess sin la politica na saja strusch reglementada e controllada. «Quest fatg na mussa betg darar las varts negativas da las colliaziuns tanter politica ed economia.» Sco ch'il president dal Cussegl grond ha ditg garanteschan las partidas in stretg barat ed ina controlla vicendaivla: «Ellas pudessan surpigliar la rolla d'in survegliader ch'è en cas da far frunt a quests svilups.»

Giaivisch per dapli trasparenza

Per ch'ellas sajan era crediblas faschesan las partidas a l'avis da Della Vedova bain da mussar lur funtanans da finanziaziun: «Quai pussibilitass ina meglra controlla da la finanziaziun da las partidas e stgaffiss, sco che jau ma giaivischass, dapli trasparenza.» El spera ch'i vegnia dà sin plaun federal dapli atenziun a quest tema durant la proxima perioda da legislatura. «Quai fiss in'ulteriura raffinaziun d'ina democrazia madira sco che nus avain in Svizra», ha ditg il president dal parlament grischun, «questa democrazia è en cas d'eliminar tut ils dubis ch'en vardad regnia propi la voluntad dal pievel, cuntrari a quai che l'aforissem cità al cumenzament pretendia.»